

Жаннат аҳлидан бўлган киши



09:56 / 01.10.2025 3183

Набий соллаллоҳу алайҳи васаллам саҳобалар билан масжидда ўтирган эдилар. Бир пайт уларга: «Ҳозир сизларнинг олдингизга жаннат аҳлидан бўлган бир киши киради!» деб қолдилар.

Шунда ансорлардан бир киши кириб келди. Унинг соқолларидан таҳоратининг сувлари оқиб турарди.

Эртаси куни ҳам Расулуллоҳ соллаллоҳу алайҳи васаллам саҳобаларга дедилар: «Ҳозир сизларнинг олдингизга жаннат аҳлидан бўлган бир киши киради!»

Яна кечаги ансорий кириб келди.

Учинчи куни яна Расулуллоҳ соллаллоҳу алайҳи васаллам: «Ҳозир сизларнинг олдингизга жаннат аҳлидан бўлган бир киши киради!» дедилар.

Масжидга яна ўша ансорий кириб келди! Мажлис тарқалгач, Абдуллоҳ ибн Амр ибн Ос розияллоҳу анҳумо ўша ансорийга деди: «Мен отам билан талашиб қолдим. Уч кеча унинг уйига кирмасликка қасам ичдим. Шу уч кун сеникида қолсам бўладими?»

Ансорий: «Марҳабо! Хуш келибсан!» деди.

Абдуллоҳ унинг уйида уч кун турди. Ансорий кечаси ҳам, кундузи ҳам бирор-бир ортиқча нафл ибодат қилмади. Фақатгина кечаси уйғонганида Аллоҳни зикр қилиб қўяр эди. Токи муаззин бомдодга азон айтгунича шу ҳолатда тонг оттирди. Сўнгра туриб бомдодни ўқиди!

Уч кундан сўнг Абдуллоҳ унинг қиладиган амалларини оз деб ўйлади ва ансорийга деди: «Мен билан отам ўртасида ҳеч қандай хусумат келишмовчилик бўлмаган эди. Аммо уч кун Расулуллоҳ соллаллоҳу алайҳи васаллам: «Ҳозир сизларнинг олдингизга жаннат аҳлидан бўлган бир киши киради!» деганларида, уч кун ҳам сен кириб келдинг. Бундай мартабага нима билан эришганингни билмоқчи бўлдим, холос!

Ансорий деди: «Кўриб турганингдек ортиқча амалим йўқ. Аммо кўнглимда мўмин-мусулмонларга нисбатан ғиллу ғаш, адоват, алдов йўқ, Аллоҳ уларга берган нарсаларда қалбимда ҳасад ҳам йўқ!

Абдуллоҳ ибн Амр розияллоҳу анҳу унга деди: «Сен мана шу амалинг билан жаннатга эришгансан. Биз тоқат қила олмайдиган нарса ана шу!

Қалбингизни ислоҳ қилинг. Ана шунда фарзлардан бошқа ибодатлар қилмасангиз ҳам, сизга зарар бермайди.

Инсонларга мусибат қалбларининг хароблигидан келади!

«Кўнглимда мўмин-мусулмонларга нисбатан ғиллу ғаш, адоват, алдов йўқ, Аллоҳ уларга берган нарсаларда қалбимда ҳасад ҳам йўқ!» деяпти ансорий...

Яъни, муомалада ростгўйлик, савдода ростгўйлик, маслаҳатда, насиҳатда ростгўйлик...

Ҳадисда келади: «Ким бизни алдаса, биздан эмас!»

«Аллоҳ уларга берган нарсаларда қалбимда ҳасад ҳам йўқ!» Ширкдан кейин қалбдан жой оладиган энг ёмон нарса ҳасаддир. Ҳасад Аллоҳга қилинган биринчи гуноҳдир. Иблисининг Одам алайҳиссаломни ёмон кўриб қолишига, Аллоҳ унга Одам алайҳиссаломга сажда қилишни амр этганида сажда қилмаганига сабаб айна ҳасаддир. Ўшанда у ўзини Одам алайҳиссаломдан афзал деб ўйлаган, бу мақомга ўзини муносиб деб билга эди!

Аллоҳ сизга берган нарсага қаноат қилинг, кишиларнинг энг бойи бўласиз. Бошқаларнинг қўлига қараманг. Агар бошқаларга берилган неъматларга

қарайверсангиз, ўзингизга берилган неъматларга шукр қилиш учун вақт топа олмай қоласиз.

Ҳадисда келади:

????????? ?????????? ?????????? ??????????
????????????? ?????? ?????? ?????? ?????????? ??????????

«Ҳасаддан сақланинглар! Чунки ҳасад, олов ўтинни егани каби, яхшиликларни еб битиради».

Имом Бухорий ривояти.

«Набавий тарбия» китоби асосида тайёрланди

Ўзбекистон Республикаси Дин ишлари бўйича қўмитанинг 2023 йил 7 мартдаги 03-07/1506-рақамли ва 2023 йил 24 мартдаги 01-07/1959-рақамли хулосалари асосида тайёрланган.